

CYBER CRIME LEH MIZO SOCIETY

by Lalthlamuana, Khatla Branch

A hmasain Cyber tih tawngkam hi Cybernetics tih atanga lakchhuah a ni a, Information & Communication Technologies (ICT) thil tihtheihna khawvel sawina a ni. ICT hian a huam zau hle a, electronics media zawng zawng entirnan Radio, Television, Audio/Video Cassettes, Internet leh Mobile Phone bakah Computer, Software, electronics leh telecommunication hmanrua hrang hrang a huam tel vek a ni. ICT hman khawlohna avanga dan bawhchhatna sual reng reng hi “Cyber Crime” an tih chu a ni a, he sualna hi khawvel ram hrang hrangin a buaipui meka, Mizoram chhungah pawh he sualna hi kan buaipui mek a ni. Khawvel a changkan poh leh sualna pawh a changkang ve zel a, tun hma a misualten silai nen a bank an rawk thin kha tunah chuan computer hmanga bank rawk a lo ni ta a, lehkha thawn hmanga invauna (extortion) leh mi hruaibo (kidnapping) te pawh E-Mail leh Mobile Phone hmanga tih a lo ni ta zawk a, nawhchizawrhna leh call girls te pawh Internet leh Mobile phone kaltlanga tih a lo ni leh ta zel a, terrorist-te tan sual rawngbawlna hmanrua pawimawh leh tha tak anih bakah khawvel ram hrang hranga terrorist-te inzawmkhawmna hmanrua pawimawh tak a lo ni ta. A bik takin Internet hian ramri kham chin a neih loh avangin thilsual titu te man chhuah an harin sual rawngbawlna hmanraw tha tak a ni. Mizoram chhungah ngei pawh hian sual rawngbawlnan a hman an awm mek a, chung zingah chuan dan bawhchhia an ni tih inhreng chung a tilui an awmlaiin thenkhat chuan dan an bawhchhia ani tih pawh inhre lova ti mek an awm baw. Cyber crime avang hian kan society-ah harsatna kan tawh mek a, mimal leh chhungkaw nun a khawih a, khawtlang leh kohhran hruaitute mang a ti ang tawh tak zet a ni. Khawtlang nun leh mimal nun siam tha tur hian thu tha inhrilh ringawt a tawh lova, dan kan neih that leh kan hman that chauhin kan khawtlang nun hi siam that theih a ni. A hranpa-in kan ramah dan siam a ngai lova a awmsa Indian Penal Code (IPC), 1860, IT Act., 2000 leh Copyright Act, 1957 te hi a tha tawh em em a ni. Heng dan hman hian cyber crime titute hi na taka hrem theih an ni a, thenkhatah chuan pawisa Rs. Nuai hnih (2 lacs) chawi theih a nih bakah lungin kum 2 lai tan theihna te a ni. Mizoram hian thil tisualte hi kan ngaidam leh mai thin a, hei hian sual a ti ngampa a, chumi avang tak chuan tunah hian kan society in harsatna kan tawh phah mek niin a lang a ni. Kan kristianna atangin kan ngaidam thei tehmeuh mai, amaherawhchu dan pawhin a tih tur a ti ve tur a ni, dan hian mirethei leh Hausa leh thiltitheih a thliar hrang ve ngai lova, keimahni dan hmangtute zawk hian mihringah kan thliar hranga, dik takin ro min reltir thei lova, chu chu kan society-in a tuar mek a ni tih hi kan pawm ngam a ngai a ni.

Cyber crime thlen chhan tam ber hi phuba laknan emaw, hlimhlawp nan emaw, sum leh pai hlawhchhuah nan emaw an ti thin. Mizoram-ah erawh chuan hlimhlawp nan leh kan mi huat zawngte tih mualpho nan cyber crime hi kan ti deuh ber. Kan buaipui ber erawh chu pornography (Saruak thlalak) leh copyright chungchang hi a ni. Kan hnam la naupan vang nge, thil chinchang kan hriat loh vang zawk, cyber crime te hi eng vakah mah kan ngai lova, dan te hi kan palzut mai mai a, kohhran leh khawtlangah pawh kan pawm zam lutuka, hei vang hian kan ram leh hnam hi la mualpho mai thei

dinhmunah a ding mek a ni. Cyber crime chi hrang hrang tam tak a awm a, chung zinga mizoten kan hmachhawn mekte chu:

1. PORNOGRAPHY (SARUAK THLALAK)

Mizoten ICT kan hman khawlohna langsar deuh mai chu computer leh mobile phone hmanga mizo nula/tlangval sex video leh saruak thlalak thehdarh hi a ni. Nula/tlangval te khan pindan chhungah, tuma hmuh lovin, saruakin thla la dun ta sela, chu an thlalak avang chuan dan an bawhchhia tihna a ni lo. Mipui hmuh theiha an pho chhuah chauhvin dan an bawhchhia tihna a ni. A chhan chu saruak thlalak hian mipui rilru a chhe lamah a hruai kawi theih avang leh midangte nunphung a tihbuai theih avangin, dan atang chuan sual a ni. Anmahni duhthuon Internet/Mobile/Computer/Print Media-ah emaw an pho chhuak anih pawhin an chungah hremna lek kawh theih a ni a, chubakah, midangin an thlalak kha ruk sak in lo phochhuah sak sela, a pho chhuaktu zawk kha hrem tur a chu a ni.

Heng saruak thlalakte hi thenkhat chu anmahni in lakte leh an bialpa lak sakte a ni a, nawhreh leh mai tura an lakte a ni. Digital camera leh mobile phone hmanga thlalak te hi nawtneh vek mah ila, computer hmangin lakchhuah leh vek theih anih avangin an rin lohna lam atangin a lo darh chhuak ta thin a ni. A tlangpuiin mobile phone/digital camera an siamtirna hmun atangtein a darh chhuak fo thin. Hetianga mi thlalak nawhreh tawh, lakchhuah saka, Mobile, Computer leh Internet hmanga thehdarh saktute hi Cyber Crime titute chu an ni. *A hremna dan chu IT Act, 2000 (Section 67) hnuaiah a ni a, A vawi khat thiamloh chantirna-ah kum 5 lungin tan bakah pawisa Rs. 1,00,000.00 thleng chawi tir theih a ni a, vawi hnih thiamloh chantir anih chuan kum 10 thleng lungin tan bakah pawisa Rs. 2,00,000.00 thleng chawi tir theih a ni.*

2. COPYRIGHT LEH PIRACY

Mi tupawhin a neitu phalna la lova lehkhabu, video film, audio cassette leh computer software te lo siam pun a tihdarh emaw sumdawn nana lo hman emaw hi "Piracy" an tih chu a ni. Khawvela computer leh music industry-in a buaipui ber pakhat chu piracy hi a ni hial awm e, kan ramah pawh nasa takin he thil hi a hluar a, chuvangin music album siamtute tana hlawk lo rawih khawpin piracy hian bu a khuar mek a, a kum telin music album siam pawh kan tlem ta tial tial a ang hle. Technology thang duang lutuk hian copy leh thehdarh te a ti awlsam tial tial a, music leh film industry siamtute an hlawk lo tual tual thung. Tunah chuan mi tupawhin mobile phone changkang kan hum ta fer fur mai a, kalpah pawhin thil kan inthawn kual zung zung ta mai a ni, hei hian a bikin music piracy a ti pung nasa hle a ni. Kan ram chhung ngeiah pawh hian hetiang tihching hi tam tak an awm. Entirnan, Kawng sira CD/DVD kan zawrh thin te, Video library a movies tam zawk te, Computer hralh a pianga pirated software an thun tel ziah te, Computer Institute tam zawka pirated software an hman thin te, Sorkar Office-a pirated software an hman zawng zawng te, Chanchinbu chhuah nan a pirated software an hman thin te, Kohhran Computer chhunga pirated software an dah zawng zawng te, Mimal Computer chhunga pirated software zawng zawng te, etc., sawi tur a van tam em, sawi

sen a ni lo, heng zawng zawng hi dan bawhchhiatna soal vek a ni. Heng soalna hi khawvelin a buaipui nasa em em a, India ram chhungah pawh mi tam tak Jail-ah khung an ni tawh a, tun thlengin tihreh theih a la ni lo. Mizoram chhungah ngei pawh piracy hian min chenchilh mek a, sualah kan ngai lo nge soal kan ngai zam zawk hriat thiam a har hle a ni. Hetiang hian kan ngaihtuah ngai em – kan zaithiamten cassette siamin an hun leh tha leh sum leh pai tam tak sengin an buaipuia, chu chu keinin kan lo pirate sak leh mai thin a, chu chuan an sum hailuh tur tam tak kan ti chat tihna a ni. Piracy avang hian kan music/film industry pawh a hlawk loh phah a, chuvangin mizote hi music/film lamah kan thlen tur chin kan thlen loh phah a ni tih te hi kan hriat a pawimawh khawp mai. Heng dan bawhchhetu te hi dan anga hrem theih an ni. *A hremna dan chu Copyright Act 1957 (Section 51/63B) hnuaiah a ni a, ni 7 (days) atanga kum 3 (years) thleng lungin a tan theih a nih bakah pawisa (Rs.) 50,000 atanga 2,00,000 thleng chawi theih a ni. Mahse, sumdawn nana hmang lova personal copy a tan hmangtu chu lungin tang lovin pawisa erawhchu Rs 50,000 thleng chawi tir theih a ni.*

3. INTERNET/ E-MAIL/ MOBILE PHONE HMAN KHAWLOHNA

Computer, Internet, e-Mail leh Mobile phone hmanga intihmualpho leh intihhmingchhiatna hi “**Cyber Defamation**” an ti a, Mizoramah hian kan ching sawt hle. A bik takin chanchinbu leh Cable TV local channel kaltlangin insawiselna lam hawi thei tih a ni ta fo mai te hian mizo society chhungah inngirngihona a thlen mai theih bakah khawtlang leh thenawm inhmuhthiamlohna a thlen thei a ni. Chanchinbu leh Cable TV local channel a fakselna, ka vei zawng leh mipui aw programme-ah te hian mi tuin emaw SMS, E-Mail, leh Internet kaltlangin thu a rawn thawn a, chu chu edit hmasa lova a nihna ang rawt a kan lo chhuahsak zel ringawt mai te, a tawpah a tichhuaktuten mawh ka phur lovang tihthe kan tarlang leh ringawt thin a, hei hi kan hriatchian loh vang nge, kan insawi fihlim tum lutuk vang zawk, amaherawhchu dan hmaah hei hian min hum zo angem tih hi kan ngaihtuah tel lo niin a lang. A thawntu te hian e-Mail account lem siamin chumi hmang chuan an thawn a, mobile phone nise pre-paid tih nunsan amahni hming pawh a register ni lo hmangin SMS an thawn bawk a, chu chu Chanchinbu ah leh Cable TV ah mipui vantlang chhiar theih turin kan chhawp chhuah sak ta thin a ni a. Hengah hian tunge mawhphurtu ni ang. Chanchinbu leh Cable TV neituten an hriat ngei ngei tur chu, hming lem hmanga mi chanchin an chanchinbu ah emaw Cable TV kaltlangin emaw an tihchhuah dawnin hming lem hmangtu hnen atangin thu delhkihna leh signature an la hmasa ngei ngei tur a ni, chuti a nih loh chuan “Cyber Defamation Case” hi chanchinbu leh Cable TV neitu te chungah hian lak theih a ni. Heng dan bawhchhetu misualte hi hrem theih an ni a, *A hremna dan chu IPC (Section 499) hnuaiah a ni a, A hremna chu cheng nuaihni (Rs 2. lakhs) chawi theih anih bakah lungin tan theih a ni.*

Heng bakah hian mi kan huat zawng leh ngei zawngte vau nan leh tithlabar nan kan hmang thin bawk. Computer, Internet, e-Mail leh Mobile phone hmanga mi vau leh tih thlabar hi “**Cyber Stalking**” an ti. Mi tu emaw, a hnathawhna hmuna a awmlai emaw, ama chenna ina a awmlai emaw, khawi hmun pawh nise a tihlauthawng zawng leh tithlabar zawnga phone leh thuziak hmanga vaute hi dan bawhchhiatna soal a ni.

4. MOBILE PHONE LEH SIM CARD

SIM Card hi a nihna takah chuan “Smart Card” a ni a, a chhungah hian processor (thluak bur) leh memory (hriatna) te reuhte a awm a, subscriber chungchang hriat tur pawimawh zawng zawng a chhungah hian a awm vek a ni. SIM card tel lo chuan mobile handset ringawt hian awmzia a nei lova, mobile phone hmang thei tur chuan SIM card neih tel ngei ngei tur a ni. Mobile phone connection thar reng reng hi heng, photo, identity proof, addresses proof leh hriatpuitu (prepaid bikah) tello chuan pekchhuah theih a ni lova, tin, mobile phone connection te hi midang hnenah inhlanchhawn mai mai phal a ni lo baw, an inhlanchhawnga soal rawngbawlnan an hmang anih chuan a tuartu tur chu a tira connection neitu kha a ni ang. Tunlai hian SIM card tih nunsu zuar tam tak an awm thin a, heng tih nunsu zuar tur hian tu hmang emaw thlalak emaw an hmang thin. Ka thu hriatna thenkhatah chuan Election photo ID card hmangte leh thingtlangmi thlate la kualin Agent thenkhat chuan connection thar atan an lo booked lawk thin a hriat a ni a, hetiang kan tih thin avang hian engtik niah emaw chuan mi, tuemaw pawisawi miahlovin hremna nasa tak a la tuar thei dawn a ni. Entirnan, Agent pakhat-in SIM card tih nunsu zuar ta sela, chu a SIM card tih nunsu chu mipakhat Tv. Zorama hminga registered ni sela. Tichuan, misual pakhat-in chu SIM card tih nunsu chu leiin mi tu tu emaw vau nan hmangin fakselna(Zonet)/Kaveizawng(LPS)-ah te mi sawiselna leh sorkar demna tichhuak fo bawk sela. Police-in misualpa hi man tumin chhui ta se, a tawpa an man tur chu Tv. Zorama hi a ni ang. Tv Zorama hian thiltih soal nei miah lo mahse case rip tak a awrh thei reng mai a lo ni. Heng hi Agent thenkhatin mi tu tu emaw hmang hawh leh thlalak hmanga SIM card an lo registered lawk thin vang a ni a, hetiang, SIM card tih nunsu zawrh leh hman pawh hi khap tlat a ni. Hetiang SIM card tih nunsu kan zawrh thin avang hian mi tuin emaw kan hmangin soal rawng an lo bawl reng thei a ni tih hi i hre thar leh theuh ang u. Kan chungah case rip tak a thlen hma hian Agent-te pawhin diklo taka mi hmanga mobile connection lo siam te, SIM card tih nunsu lo zawrh thei hi i ti tawp ngamin i zuar lo ngam ang u.

Tin, SIM Card chung changah tunlaiin thiamna a sang tawh a, kan SIM card te hi clone (a dang an pui, a mah ang tak) theih a ni a, a naranin i mobile phone kha SIM card telin mi hnenah emaw unauthorized service centre-ah emaw siamtir turin pe suh ang che. i SIM card kha clone anih chuan midangin I number hmangin soal rawng an bawl thei a, call leh SMS pawh an duh duhin an siam thei a ni tih hre reng ang che.

5. E-MAIL LEH SMS HMANGA INBUMNA

E-Mail leh SMS hmanga inbumna hi tunlai khawvelah a hluar hle, chung zingah chuan “Nigerian Scams” hi a lar berte zinga mi a ni. Chung an thu thawn tlangpui chu “Pawisa tamtak i dawng a, i bank account min hrilh la, kan rawn deposit dawn nia..... Africa ramah mi hausa tak a boral a, thurochhiah a neihloh avangin a pawisa hi i account-ah rawn dah a ni anga, 50% i ei dawn nia..... Lottery i man a, a processing fee \$4000 hi he account number-ah rawn deposit rawh....” tih vel an thawn thin a, mitam

takin a tak tak emaw tiin an sawi ang angin an ti thin a, a tawpah bumna thang a ni tih an hriat hnuin a lo tlai tawh thin. Mizoram chhungah hetiang inbumna avanga tuar chhungkaw tam tak an awm tawh a, chung zingah chuan in leh lo chan phah hialte pawh sawi tur an awm bawk. Heng lakah hian mizote kan him theihna turin i fimkhur tlang ang u.

Tin, e-Mail account password vawn him that tawk loh avangin kan password te hi midangin min lo hriatruksak thei a, chutiang a midangin min lo hriatruksak anih chuan kan e-Mail account hmangin sual rawng an bawl thei thin a ni. Hetiang lam kaihhnawih pakhat sawi tur awm chu, Kumin May ni 20, 2009 khan Reverend pakhat chuan SP Aizawl hnenah FIR a submit a. He FIR-a a lan dan chuan mi tu tih hriat loh ten a e-mail password (hotmail) chu lo thlak sakin, a e-mail account hmangin Reverend thian te hnenah London a zin thu te, a wallet a tih bo vek thu te leh hotel bill pawh pek tur a neih loh thute a thawn a, pawisa US Dollar 2500 chu Western Union kal tlanga puk tir turin an lo dil tih hriat chhuah a ni. Hetiang hian misual tuten emaw kan hmangin sual rawngbawl nan an hmang thei a ni tih kan hriat a, kan fimkhur a tul tawh hle.

Tunlaiin e-Mail leh SMS hmangin thu pawimawh tak tak kan in thawn thin a, hemi chung changah hian fimkhurna tur tam tak kan nei, entirnan - mi pakhat chuan phaia awm a fanu hnenah pawisa a thawn dawn a, a fanu chuan a bank account number e-Mail in a rawn thawn a. Mahse, he e-mail hi misual pakhat (Hacker) in a lo hmufuh a, tichuan a bank account number ziah kha lo ti danglamin, ama bank account-in a lo thlaksak a, tichuan, a nu chuan a fanu bank account-ah pawisa a dahlut (deposit) emaw a tih kha misualpa (Hacker) bank account-ah a lo lut daih si a, hriatchhuah a nih meuh chuan a lo tlai zo tawh a ni. Heng inbumna hi tunlai khawvelah a hluar hle a ni tih hria la, fimkhur hle ang che.

6. INTERNET BANKING LEH ATM

IT hmansualna langsar ber pakhat chu credit card leh debit card inruksakte leh bank account atanga pawisa inlakchhuah sakte hi a ni. Internet leh Mobile Banking lar chhoh hnuah hian cyber crime hi a nasa zual ta emaw tihtheih a ni a, tunlaiin, Mizoram chhungah pawh Computer, Internet leh ATM khawl hmangin awlsam takin pawisa Bank atangin kan lachhuak thei tawh a ni. Hetia thlamuang tak leh awlsam taka Bank kan dawr zung zung theih tawh lai hian misualten remchang zawngin Credit card, Debit card leh Bank account-te hi electronics media hmangin min rawk thei a, kan hriat loh hlanin pawisa pawh kan bank account atangin min lo lakchhuah sak thei a ni. Internet kaltlanga sumdawwna ti thintute leh thil lei thintute hi kan fimkhur a ngai leh zual a ni. Tin, ramdanga kan zinin ATM machine kan hman turte hi hriatchian a pawimawh em em bawk a ni. Hmun thenkhatah chuan ATM Card Skimmer te leh Hidden Camera-te an lo fit thin a, chung hmang chuan ATM card number leh PIN number-te an lo hreru thin a ni. Hetianga IT hmansualna hi tam tak sawi tur a awm tawh a ni.

Phai rama zirlaite tan zirlai zir zawh hnu a, Mizoram lama lo haw chhoh dawnin Passbook leh ATM card te midang hnenah hlan chhawn emaw hralh emaw tih loh tur a ni. Hetiang tih avanga harsatna tawk mek mi thenkhat Mizoram-ah kan awm, hei hi a

pawi hle a ni. Phai ramah khuan mi thenkhatin zirlai haw turte hnenah Bank Account lei tur an zawng a, an hmuh chuan bank account kaihhnawih zawng zawng, Pass Book, ATM Card (Pin No nen) an la thin a. Heng ho hian Internet kaltlangin mi Bank Account atangin pawisa an ru chhuaka, chu an pawisa ruk chhuah chu an Bank Account lei thar (zirlaite atang a an lei) ah khan an dahlut (transfer) thin a, tichuan ATM card hmangin chu pawisa chu an va lachhuak leh thin. Hetiang ang thil ah hian Mizo zirlai tam tak an awk tawh a, phaiah te lehkhah zira an kalin an account te an hralh ta mai thin a, hei vang hian harsatna an tawh mek a ni. Tunah pawh Mizo tam tak hetiang avang hian an buai mek a ni.

Internet Banking chungchangah hian fimkhurna tur leh hriat tur pawimawh tak tak Mizote hian kan nei a, chung zinga thenkhatte chu: (1) e-Mail hmangin tu emawin i bank account check turin a rawn hrih che a, click mai theih turin “link” a rawn pe bawh che a, chu “link” chu i click veleh hmun dangah a hruai daih thei che a ni. Kha site kha nangma banking site nen inang chiahin an siam a, username leh password i chhutluh chiah khan i bank account kha an lo hack theih phah ta a ni. Chuvangin e-mail atanga i dawn “link” reng reng visit loh tur, a bikin bank account i neihna website phei chu nangmah ngein i chhulut anga, engtiklai pawhin “address bar” entry kha a dik ngei ngei tur a ni. (2) Kan ram chhunga Bank-te hi computerized a lo ni ta fur mai a, hengah hian kan fimkhur a ngai hle bawh. Entirman tu emawin bank server chhungah computer program pakhat dah lutin, chu program chuan bank account neitu zawng zawng hnen atangin thlatin Rs. 1/- zel an account atangin automatic-in lo paih (deduct) sakin ama account-ah lo in deposit tir thin sela, a bank account neitu tan a hriat tham mai si loh avangin hmuhchhuah a har em em thin. Hei hi mi bank account atanga pawisa inruksak dan kawngkhat a ni a, hengah te pawh hian kan fimkhur a ngai tan tawh hle a ni.

7. CABLE TV NETWORK LEH LOCAL CHANNEL

Mizoramah kum 1990s chho vel atang khan Cable TV Network kan nei tana, tunah phei chuan local channel neiin mizo programme leh film tha tak tak chhuah thin a ni. Amaherawhchu heng kan film pek chhuah turah hian kan fimkhur a ngai hle. Kan fimkhur tawh loh avangin thangthar, naupang, zirlaiten nun dan thalo an zir chhuahphah thei a ni tih hi kan hriat a va tha em!!. Mizoram chhunga Cable TV Operator-ten hei hi i hre theuh ang u - Cable Television Networks Acts, 1995 dan bakah hian Cinematography Act, 1952 dan a awm a. Heng dan hian a phut chu eng film pawh mipui hmuha chhuah a nih hmain Central Board of Film Certification (CBFC) an pal tlang ngei ngei tur a ni a, a chhuah dan turah pawh hetiang hian category hrang hranga thliar a ni:

SN	Category	En thei turte	Chhuah phal hun
1.	U	Mipui vantlang en theih	Eng tik lai pawhin
2.	S	Special category tihna a ni a, heng film te hi technical, scientific, medical emaw lam film tihna a ni a. Mi zawng zawng en chi a ni lova, hetiang lama mithiam bik te chauh en chi tihna a ni.	Eng tik lai pawhin

3.	U/A	Kum 12 aia naupang en phal loh a ni. Kum 12-18 inkar naupangte chuan nu leh pa te kaihhraina hnuai ah an en thei ang.	8:00 pm-4:00 am
4.	A	Puitling kum 18 chung lam chauh en chi a ni	11:00pm-4:00 am

Kan local channel-ah hian heng category thliar hrang miah lo hian film chi hrang hrang duh hun hunah cable TV operator te hian an chhuah mai thin niin a lang. Heng hi dan bawhchhiatna sual a ni a, hrem theih an ni tih kan hriat a pawimawh hle.

Tin, Local channel-a fakselna, ka vei zawng leh mipui aw programme a an vei zawng thurawn thawntu tam berte hian mi dangte siam that duhna aain sawisel duhna rilru anrawn pholang thin niin a lang. Mahni hming leh address pawh tarlang ngam si lovin mi dangte sawiselna leh duh loh zawng thil tarlan chiam nan anrawn hmang thin a, Mizo mipuite min indotir mai ang tih hlauhawm thei tak a ni. Heng programme hi kan khawtlang tan inpumkhatlohna leh inhmelmak theihna tur thil vawrh chhuahna hmanrua anih theih avangin a tha lova, mihring nun siam thatna aain in huatna thlen tir theitu a nih avangin Local Channel pechhuaktute pawh an fimkhur deuh a tha hle awm e.

8. CYBER CAFÉ LEH INTERNET

Tute pawhina Internet man chawia an hman theihna hmun “Cyber Café” hi khawvel hmun hrang hrangah a awm deuh vek awm e, Mizoram chhungah pawh hmun tam takah hmuh tur a awm. Heng Cyber café atangte hian kan thalai tam zawk chuan Internet leh e-Mail hmandan an zirin an thiam a. Hetianga mipui vantlang hman theih tura siam a nih vang hian khawvela cyber crime lo chhuahna tam ber pawh hi cyber café atangin a ni duh hle. A chhan chu cyber café neitute hian a hmangtute hi an chhinchhiah that tawh loh avangin thilsual titu dik tak manchhuah a harsa em em a, chuvangin cyber café neitute hian an tawrh phah fo thin. *Entirnan misual pakhatin cyber café atangin e-Mail hmangin tu emaw hnenah vauna/tihthlabarna thu emaw thawn chhuak sela a thawn chhuahna computer kha awlsam takin zawn chhuah theih a ni. Amaherawhchu cyber café neitu khan misualpa Identity leh record fel fai taka a vawn that loh chuan police ten cyber café kha anrawn chhuichhuah hunah thil tisuatu kha hriat anih theih dawn loh avangin cyber café neitu zawk kha a mawhphurtu ber tur chu a ni. Chuvangin Cyber Café neitu zawng zawngin a hmangtute particular kim chang takin log book ah an ziak lut ang a, an photo ID card pawh xerox copy an kawlsak ngei ngei tur a ni. Tin, Mizoram chhunga hotel thenkhatah an mikhualten Internet an hman theihna turin wireless LAN hmangin connection a free-in an pe thin a, Computer Insitute thenkhat-ah pawh Internet facilities pek an ni bawh a, hetiangami hrang hrangin Internet an hman theihna hmunah reng reng hian fimkhur a ngai tak zet a ni. Kan fimkhur loh avangin kan thil thilsual ni lovah hremna kan hmachhawn thei a ni tih hi kan hriat a pawimawh hle.*